

A Tarik le Ni

Lesson 5: Johan 2:12-25

26.4.11 (Thawleni)
27.4.11 (Nilaini)
28.4.11 (Ningani)
29.4.11 (Zirtawpni)
29.4.11 (Zirtawpni)
29.4.11 (Zirtawpni)
30.4.11 (Inrinni)
30.4.11 (Inrinni)

Vengbuk

West Delhi
DU North
Munirka
RK Puram
Vasant Vihar
Mehrauli
Mahipalpur
South Extn

Thuoitu

Pastor Lalditsak Inbuon
Upa Lalsiemlien Pulamte
Pastor Lalditsak Inbuon
Pu Laltlana Chhangte
Upa Lalsiemlien Pulamte
Pu Timothy Shakum
Upa Lalsiemlien Pulamte
Pastor Lalditsak Inbuon

Lesson 6: Johan 3:1-21

10.5.11 (Thawleni)
11.5.11 (Nilaini)
12.5.11 (Ningani)
13.5.11 (Zirtawpni)
13.5.11 (Zirtawpni)
14.5.11 (Zirtawpni)
15.5.11 (Inrinni)
15.5.11 (Inrinni)

West Delhi
DU North
Munirka
RK Puram
Vasant Vihar
Mehrauli
Mahipalpur
South Extn

Upa Lalsiemlien Pulamte
Pastor Lalditsak Inbuon
Upa Lalsiemlien Pulamte
Pu Laltlana Chhangte
Pu Timothy Shakum
Pastor Lalditsak Inbuon
Pastor Lalditsak Inbuon
Upa Lalsiemlien Pulamte

Lesson 7: Johan 3:22-36

24.5.11 (Thawleni)
25.5.11 (Nilaini)
26.5.11 (Ningani)
27.5.11 (Zirtawpni)
27.5.11 (Zirtawpni)
27.5.11 (Zirtawpni)
28.5.11 (Inrinni)
28.5.11 (Inrinni)

West Delhi
DU North
Munirka
RK Puram
Vasant Vihar
Mehrauli
Mahipalpur
South Extn

Pastor Lalsiesang
Upa Lalsiemlien Pulamte
Pastor Lalsiesang
Pu Laltlana Chhangte
Upa Lalsiemlien Pulamte
Pu Timothy Shakum
Upa Lalsiemlien Pulamte
Pastor Lalsiesang

Inhriettirna le ngenna

Mi tuel khom sermon, Pathien thu tieng artikul, testimony le thuthar/hlathar donghaiin hi Chanchinbua insuo ding in hung pêkthei zing. Chun, hi Chanchinbua ei kohran chanchin le rongbawlina ei insuo hai hi mimal le vengbuk inkhawm tongtaina subject-a hmang nghal dingin ei infiel bok a nih. Chu khêlah, Pathien rama thahnemngai a, ei Chanchinbu page sponsor nuom dâm ei um chun phêk khat peiah Rs 100-a sponsor thei zing a ni bok.

- Editor

Hrepuitu : March&April 2011



Hrepuitu

HMAR CHRISTIAN FELLOWSHIP DELHI CHANCHINBU

Krawsa Isu Krista tongbau pasari hai

Kristien Puitling Nun

Pathien le intlon – Nova chanchina inthoka inchûk ding

Chuong thil po po chu a hrepuitu in nih. (Luka 24:48)

Hrepuitu : March&April 2011

Hrepuitu

Hmar Christian Fellowship Delhi
Chanchinbu Thlakip Suok
Vol. 6 No. 3&4 (Mar&Apr, 2011)

Editor:

Upa Lalsiemlien Pulamte

Jt. Editor:

Pastor Lalditsak Inbuon

Editorial Members:

Lalchungsiem Thlawngate
Timothy Shakum

Address:

Editor, **Hrepuitu**,
14/16, MS Building,
NPL Colony,
New Rajinder Nagar,
New Delhi - 110060

Tel: 09868183268

Email: hrepuitu@yahoo.com

Lakman:

Copy khat Rs 10.00

Kum khat Rs 100.00

Suttu:

Upa Lalsiemlien Pulamte
(Hmar Christian Fellowship
Delhi aiin)

Hi chanchinbu-a hin Hmar Christian Fellowship Delhi le a rongbawlina chanchin a chuong a. A sunga thuhai hi Pathien rongbawlina hmangruoa hmang nuom ta dingin hmangawng le lâksawng thei a nih a. Thawsuol le sukdi knaw pal thua ruok chu ahmangtu'n maw phur a tih. Ngaidân suklanga um(hai) hi HCF Delhi ngaidan a(n) ni chuong kher nawh.

- Editor

Editorial.....

Krawsa hnena hlado insam chu

Eden huona Pathienin mihriemah a lalram a'n din kha Setanin a lo suksiet top a. Juda thlaa inthok sandamtu Mesia hung ding zawlneihai hmanga hrillawka um kha Judahai chun an lo beisei êm êm. Sienkhom Mesiaah an beisei chu David hnuoi lalram indina Rom sorkara inthok inhnûkdok a nih. Jentelhan sandamtu ei hmu theina dinga Judahai mit sukdel pêka um hi Pathien remruot a lo ni lem hlauh a nih.

Eden chul tah hnung siemtharna sin chu krawsah Isu Kristan a hung thaw zo a. Pathienin a lalram a hung indinna, Kalvari tlâng kraws hi khawvel mitah chu a ropui naw hle. Khawvel sivilâizeson le sorkarin an lalram indinna thu an puongna hmunhai chu khawpui le in ropui tak tak dâm a ni hlak a. Pathien lalram thu puongsuokna ruok chu kraws, a hmaa mi neitu Setan hnea a umna hmun a ni tlat a nih.

Kraws – thil tlawm tak, hmusit um tak, endong tlâk le mi khawhlohai hremna hmuna chun “A kin tah” tiin hnena thu Pathienin a mi puong pek tah a nih. Kraws chu Isu Krista zarin ei sandamna dinga hmangruo ropui tak a lo inchang tah. Kraws hin ei Lalpa min tlanna le a sandamna min hrietsuok tir pei sien ei nuom. Chuleiin “Aw kraws, ka va ngaisang che de aw!” tia hla ei sak hi a awm hrim a nih.

-Upa Lalsiemlien Pulamte

Hrepuitu : March&April 2011

Sunzawmna....

Kristien Puitling Nun

Tirko Paula nun hi sui rawn inla chu ringna kalchawinaa inchûk ding tamin ei puitling pha ngei ring a um a nih. Ringnaa mihrâng lo fe tahai nuna inthok khoma inchûk ding tam tak ei nei a nih. Ringna kalchawina hi mâni khât khomin baibul tiemin ei inchûk thei a, tiem ding dang lekhabu tha khom a tam a, chu bakah vêngbuk le chawibiek inkhawma hai khom inchuk dok thei a ni bok. Ei prokram siem hai hi mani sengah ei hmang tangkai naw chun ei thuoituhai a thlawnin ei intlân sawl tir mei mei el ding a nih. Chuleichun, mânia innghat lieu lieu a nih.

An leh, eini lai hin, a bîk takin Fellowship thuoituhai hin Paula tongkam ang hin 'Unauhai, ka um dân inchûktuhai ni pei ro' mipui hai kuomah ei ti ve thei ding am? Ei ti ve ngam ngeina dingin ei hringnun Pathien kuomah inhlan thar ei tiu. Hi lai zing hin, thil a hlutna hi zong a hmang tangkai pei dingin ei inditsak bok a nih. Asan chu an leh, eini lai khom hin mi tha le fel tak tak enton tlâk ei um a, annia inthoka inchûk ding umhai inchûka a zawmtu ni pei inla chu ei kristien kalchawina konga hin puitling tieng pan pei tâng ei tih. Chuong chun naupang tongin tong ta nawng ei ta, naupang lungril khom put ta bok nawng ei tih. Naupang ngaituo dân ang khomin thil ngaituo hlak ta ngai bok nawng ei tih. Lalpa'n a thu malsawm raw se. Amen.

Sunzawmna.....

Pathien le intlon – Nova chanchin inthoka inchûk ding

tâng tâng a nih. Filipi lekhaton hi Tirko Paula'n a hun lêr tieng, a thi tawma lung ina inthoka a ziek a nih. Misawnari sin nasa taka thawa kohran hai khom iemani zât phun a, Krista ta dinga tuor thei po po deu thaw tuortu hmana thangsuo a la'n ngai loin hmabâk neiah a la'n ngai chun eini hai lem lem hih hmabâk hau le hma tieng thil hnot ding ei la hau awm de! Pathien ei la'n tlonpui tha zo rak naw khom ning a tih ie, Pathien titna le ama hrietnaah ei la puitling tawk naw em el hih.

TUOLSUNG CHANCHIN

Pastor Lalsiesang Zote chun Union Biblical Seminary, Pune-a BD an chûk chu hung zoin an sungkuoin Delhi-ah rongbawlina sunzom dingin an hung kîr tah. A'n chûk sunga thuoitu Pathien chun rong an hung bawl huna khom malsawmna tam taka a thuoi zom pei theina dingin tongtai pek ei tiu.

Pastor Lalditsak Inbuon le Tv. Zarzoliem Infimate hai chu Union Biblical Seminary, Pune-ah Bachelor of Divinity inchûk thei dinga thlangsuok an nih. June 2011 khin an inchûkna ding tieng lo pan tang an tih. Inchûk thei dinga an um leiin Pathien kuomah lawmthu hril ei tiu.

Hrepuitu : March&April 2011

A Ram le A Felna

-Pu Zarzolien Keivom

“A ram le a felna zong hmasa lem ro; chuongchun,
chuong po po chu a peksa ding cheu a nih” (Mathai 6:33)

Pathien ram le a felna nekin thil dang ei zong hmasa leiin ei ram, ei hnam le kohran hai puitling thei lova thuonawp zing ei nih. Ei ram kohranin a mamaw tak chu sum le pâi nekin Pathien ram le a felna zong hmasak a nih. Chuong ang bokin ram le hnam siemthatna dinga hmangruo tha tak khom Pathien thu bok hi a nih. Ram le hnam siem that tumin beipui khom ei thlak ngun tah; a siemthat nekin siet tieng ei pan lem deu deu ti hretu le hmutu seng ei nih. Ei hnam hi Pathienin a thu le hla hmanga mi siem that a tum a nizie ei hriet a makmaw a nih.

1992 lai vêl khan revivalin ei ram a hung mût hning dur dur a, khawtlang nun chu hung siemthain thalai zu le damdawi inrui hlak hai chun Pathien thu hung inrui ta lemin, rukru khoma thil inruk ding zong lovin an thlarau chawmna ding Baibul châng hai an hung zong lem tah a. Pawl dâi hai thiekin biek in khata inlawi tlângin Chanchintha ruoi an kil tlâng a. Lalpa Isu'n a mi tiemsa angin thlarau tieng malsawmna ei dong hai taksa malsawmna khomin a hung zui ve nghal a nih. Lo sinthawna tieng thlai a tlung tha a, bu tin khat tuna hmunah tin 100 chuong dam an inthar a, aithing zorin ei ramah poisa crore têt ei lam bok. Chuong lai zing chun kohrana ei thuoiu thenkhat

BP insâng khuong inring le inrang ngai thei lo leiin ei ram chu revival chun a tinsan ta nghal a, revival kha châm zing chu nisien taksa malsawmna khom a châm ve zing ding bah.

Ram chite khom nisien Lalpa, Pathiena nei hnam, Ama rochan dinga mi a thlanghai chu an hamtha a, taksa thila khom malsawmna an dong tei hlak. Europe rambung po po khom khu kristien ram vong, revival thlipuiin a lo chil hrep vong an ni leiin ram hausa le changkang vong, chanchin tha thedaru khom an lo ni hrim a nih. Ei rama khom chanchin tha a hung lut hlim lai khan kum tin deu thawin harna a tlung hlak. Chu chun ringtu nun a siem thar a, kohran chawmna dingin hrânghluihai chu Pathienin hla tha tak tak a pêk a, voisun chena chul ta ngai lo dinga kohran chawmtu le ei tong suk hausatu dinga Pathien hmangruo a ni ta pei a nih.

Ram dang sum le silai hmang lova Pathienin ei hnam hi sukchangkang a tum a nizie ei hriet a tul takzet a nih. Hi hi a nih, ram le hnam kohran changkângna ding lampui chu. Pathien ralthuom felna awmphaw ngei chu inbelin hnam dang rûn ei tieu, lungril hne hi a ni hnena famkim chu.

Krawsa Isu Krista tongbau pasari hai

-Upa Lalsiemlien Pulamte

Isu Krista chu khawvel (nang le kei) suol leiin misuol angin an man a, khêl tin rengin an hêk a krawsah an hemde a. Krawsa khan tongbau pasari a hrilsuok a, a hnungzuituha'n chuonghaia inthok ei inchûk thei ding hai hei tarlang ei tih.

1. “Eloi, Eloi, lama sabakthani” (Mat 27:46). Chu chu **“Ka Pathien, ka Pathien, ieng dinga i mi maksan am?”** tina a nih. Hi lai thu hi Sam 22 le khom a'n zul a ang khop el. Sama chun “Aw ka Pathien, ieng dinga i mi zamsan am? Thangpui ngaia ka'n rûm lai hin, ieng leia mi'n hlat am i na?” tiin a'n ziek a. Thu taksaa hung inchang, Isu Krista chu zaah za Pathien a ni ang bokin zaah za mihriem a nih a. Chuleiin, lungngaina le rinumna hre thei mi a nih. Getsemani huona khom khan krawsa a thil tuor ding raphthlakzie kha a hriet leiin mihriem ram takah harsa le thlaphâng um a tih a, “Aw Pa, a thei chun hi no hin mi pêl hram raw se” tiin a tongtai hiel a nih. Khawvel suol a phur leia krawsa thina intlun thei khop tuorna raphthlak a tuok lai khan a santheitu ding a Pathienin a maksan hiel ta anga ngaiin a ko a nih. Eini hai khom thina thei ngirhmuna ei hang um meu pha chun ei Pathien hming lamin ei ko khek zak el hlak a nih.

Hi lai thu hi Isu Krista'n ei suol a phur leia Pathienin a en ngam naw anga hril dan khom a um bok. Chun Pathien chu a thienghlim leiin khawvel suol po po phurtu kha a tlânsan a nih tia hridan dang khom um bok a tih. Hi ngaidan hai hi an indik chie am ti ngaiven a awm khop el. Pathienin a Naupa a hung tirna san a hlenna ding a ni leiin Pathien a lawm lem

ring a um a nih. Isu Krista vekin “Ka Pa ditzawng thaw chu ka bu a nih” a ti bok a. Chun a thina le a thonawkna hin a Pa a chawimawi a ni thu khom ei hmuh.

2. **“Pa anni hi ngaidam rawh, an thilthaw hi an hriet naw a ni hi”** (Lk 23:34). Rom sipaihai khan an hemde Isu Krista kha Rom sorkar chung a Lal le van Lal Nau a ni ti hre hai sien chu an hemde naw awm vei leh! Judahai khan Isu Krista kha an Mesia a ni ti hre hai sien chu hemde naw ni hai. Sienkhom tuhin chu an ta dinga muongna hung intluntu ding an hmu thei lo dinga thup a ni si a (Lk 19:42). Peter chun Judahai le an hotuhai thilthaw kha (Isu an hemde) an hriet naw lei a nih (TT 3:17) tiin a hril. Tirko Paula khoma “Jerusalema umhai le an roreltuhaiin ama (Isu) chu an hriet naw a (TT 13:27)” a ti bok a nih. Chuleiin an thilthaw kha an lo hriet naw hle a nih.

Isu Krista chun inchûktirna thar a pêk a. Ama chun “I venghai hmangai la, i hmelma chu theida rawh” an ti hi in hriet. Kei ruok chun ka hril cheu hi, i hmelma chu hmangai la, a suknomnatu che chu tongtaipek rawh” tiin a lo hril a (Mat 5:43-44). Hi thu hi a tak ngeia inchuktirin Isu Krista chun a hmelma le suknomnatu hai ta dingin a tongtaipek a nih. Ti tak êma chu, krawsa a thi khom kha Pathien hmelmahai ta dinga thi a ni kha. Hmelma

leia ei tuor lai khoma an ta dinga tongtaipek a mi'n chûktir a nih.

Stefen khom khan lunga dengtuhai ngaidama an umna dingin a tongtaipek a ni kha. Ngaidamna hi Kristien nuna dingin a hluin a poimaw em em. Pathien le ei inrem thei nawkna khom ngaidamnaa inthoka hung intan a nih. Chu chu ni siin hmelmâ kâr chu hril lovah, ei Kristien ramah ringtu le ringtu amanîh unau le unau kâra ngaidamna sinthaw hmu ding a vâng nuom el tah hi ei inngaituo dingin a poimaw a nih. Tirko Paula ruok chun Efesi 4:32-ah “Pathienin Kristaa a ngaidam ang cheu khan inngaidam tuo ro” a lo tih.

Chun, misuolhai ta dinga a Pa, Pathien kuomah hrilpuitu le ngaidamna an chang theina dinga palai sin thaw a ni bok a nih. Isu Krista palaina hi ringzo a umin suong a um em em a nih.

3. “Voisun hin thu dik ka hril che hi, ka kuomah paradîs-ah um vêng i tih” (Lk 23:43). Vanram hi lunglhu mawi tak taka chei ni sien khom Pathien a cheng si naw chun inhoi chuong naw nih. Chu ram inhoia an tlansahai chauh ei cheng chun an hoi bik ka ring nawh. Eini misuol ta dinga krawsa tuorna rapthlak tak tuora a hringna chen khom pe phal mi hmangaitu kuoma um le cheng chu thil inhoi le thlakhla tlâk tak a nih.

Isu Krista mi hrietzing le a kuoma cheng ngen hi in phalam ding an nawh. Ama chun Zakai kuomah “Mihriem Naupa hi bohmanghai zonga sandam dinga hung a ni him a nih” a lo tih a. Suol sima ama kuom pan hai chu a hnawî ngai rêng rêng nawh.

Isu Krista leh suomhmang pahni an hemde sa a. Chu laia pakhat chun Isu Krista chu esêl tak le hmusit takin Isu a

bieksaw a. Taksa damna ding bâk beisei nei loin Isu kuomah “Insukdam la, keini khom mi sukdam ta la” a tih a. Suomhmang dang pakhat ruok chun Isu Krista chu Pathien a ni hrein thlarau sandamna petheitu a ni a ring a, chuongchun Isu kuomah “I ram i lung pha mi hre zing raw aw” tiin a ngên a. Krawsa Isu a thi mêk lai hmu zing sia Isu Krista hi ama rama a la hung ding a hriet hi ringna inpâktlâk a tling a nih. Beiseina neia ringna leh Isu Krista hung panhai chu an hlawsam naw angin hi suomhmang kuoma khom hin Isu chun a kuomah paradîs-ah a um ve ngei ding thu a puongpêk a nih.

Isu Krista inbiekpui thei seng seng le a kawla um seng seng khom an ngirhmun a'n thlau nuom sawt khop el. Taksa thi tawm ruoi khom hin Isu Krista sandamna kut chu tu tading khoma a tawi naw a nih. Amiruokchu thi tawm chauha Pathien zong ding tina a'n chuong nawh. Tuin am a thi tawm hre thei a ta? Hi suomhmang khom hin thlarau sandamna chu a chang ngei a, sienkhom kut ruokin vanram a lut ding a nih. “Thi chu tiin ka lungngai nawh, sienkhom ka sandamtu tuok dingin kut ruokin fêng ka ti maw?” ti hla saktu ni naw hram inla nuom a um.

4. Isu chu rawl inring takin a khê a, **“Pa, i kutah ka thlarau ka'n koltir”** a ta. Chu chu a hril zoin a hnuk a chat tah a (Lk 23:46). Matthai le Johan chun ‘a thlarau an thla tah a’ tiin an ziek a. Ei tongkam chun ‘Isu a thi tah’ ti thei a nih. Hi taka hin Rom sipaihai le Juda hotuhaiin a ngiel a ngana Isu Krista an that thu a hril naw a, chun an soisakna po po hai leia a thi pha tah thu khom a hril bok nawh. Isu Kristan a Pa ringzo tak le a kuoma intuklûta a hringna an hlan thu ei

chun a pumraw rimtui chu a lo hriet a, hnuoi hi mihriem leiin tongsie a'n phur ta naw ding thu le thilhring danghai khom a hrem nawk ta naw ding thu ei hmu. Mi fel pakhat chauh inthawina chun Lalpa lungril a hne a nih. Hi chena khom hin Lalpa le an intlon a nih. Chun, chi tam tak thlaa hung punga, hnuoi hi hluo sip dingin Pathienin Nova le a nauhai chu mal a sawm a.

Gen 9:20-21-a chun “Lo nei mi Nova chun grep huon a siem a. A uoiin siem chu iemani zât a dawn a, a'n rui a, a puon ina chun saruokin a zâl a” ti ei hmu a. Chun saruoka a zâl Hama-in a va phawk leia Ham naupa, Kanan tongsie inphur a ni thu khom ei hmu bok. Tuilet hma khom khan Nova hi lo nei mi tho a ni ring a um. Chun kha hun lai khan uoiin an rui thu khom ei hmu bok nawh. Tuilet hnung, Pathienin Nova le a sung hai hmanga hnuoi hi a'n hluosip tir tum a, chu ding chun bu-le-bâl le uoiin hai malsawmna pekin an um khom ning a tih. An rui taluo leiin saruoka zâl a ni khom a'n hriet ta naw a nih. Chu kakhawk pei ei en chun hnuoi hluosip dinga Pathienin a ruot mi pakhat chungah tongsie inphurin a hung um lem tah a. Hieng anga buoia ama mimal chinchang khom a hriet naw lai hin Lalpa le an intlon dan ding thu um naw nih. Hi taka inthok hin Pathien le an intlon thu amanîh Pathien a chung a lungawi thu khom hmu ding a um ta nawh. Nova chu tui let hnungin kum 350 a la dam a. Tui let hnunga Nova hringnun ei en chun kum 350 a ni naw khoma a hun ler tieng

Hrepuitu : March&April 2011

Pathien le an intlon ta naw a ang khop el. A tan that vai leh a tawp chen thaw tha sien ni ding bah, a poi ngot el.

Nova hun hmaa mi fel ve pakhat, Enok a chanchin Gen 5:21-24-a ei hmu dânin kum 65 a niin nau pasal Methusel a nei a, chu hnung kum zathum Lalpa leh an intlon a. A dam kum po chu kum 365 a nih. Pathienin a lak hmang chen Lalpa le an intlon thu ei hmu. A hun bul tienga inthok a khawvel hringnun tawp chenin Lalpa leh an intlon a nih. Pathien leh an intlon nuna hin Enok hin pension a lak naw a nih.

Aw leh ringtu/ piengthar nun lam ei hrawnâ khom hin ieng tik lai khoma ei inenfie zinga ei ngirhmun ei inbie chieng hlak a ngai a nih. Ieng tik hun lai tak khan am felna lampuia inthok ei lo pêt hmang a? Ei ieng thilin am Lalpa le ei intlonna a mi dal amanîh a mi hluo hlak a? Lekha inchûkna le sin thawnâa hlawtlingna hai dâm, sin hmu thar hai dâm, nau le tea malsawmna hai dâm, in-le-lo buripna dâm, ropuina hai dâm, inlalna hai dâm le thil dang dangin Lalpa le ei intlon an mi hluo am ti hi inenfie hlak a ngai a nih. Annaw leh, Lalpa le ei intlonnaa ei phâk china hin hun tawk tah vieuah ei lo ngai pal el am?

Tirko Paula chun phâkchin sukdika hma tieng pan pei dingin a mi'n fui a. Ama vênin “Siem famkima um tah inti ka ni nawh; Krista mi man san chu hlen ngei tumin hma tieng ka nor pei a ni lem” (Fil 3:12) a lo tih. Thangsuo taah a'n ngai dêr naw a, chu nekin hnung tieng thilhai chu theinghilin hma tieng thilhai a hnot (*Phek 11na ah sunzawm anih*)

Hrepuitu : March&April 2011

Sermon.....

Pathien le intlon – Nova chanchin inthoka inchûk ding

-Pi Lalrotluong Pulamte

“Nova chu mi fel tak, a dam ruolpuihai laia dem kai lo,
Pathien le intlon hlak mi a nih” (Genesis 6:9)

Lalpa chun hnuoia mihriem suol nasat takzie le ieng lai khoma an ngaituona suol tieng a awnzie chu a hmu a. Mihriem a lo siem chu poi a ti a, a lungril a na hle a. Chuongchun Lalpa chun “Mihriem hai, ramsa hai, hnuoia invak le intawl thilhring hai le chungleng vate hai hi nuoibo el ka tih, ka lo siem tawl kha poi ka ti a nih” a ta. Nova hun laia khawvel kha a lo sie rapthlak hle ning a tih. Mihriemhai chau ni lovin rannung le thilhring hai khoma Pathien mit an tlung zo ta naw a nih. Pathien mithmuin hnuoi hi a porche zo ta a, inpawngnêknain a sip a. Gen 6:12-a chun hnuoi hluotu mihriemhai um dân porche leia nasa taka hnuoi a siet thu ei hmuh a, mihriemhai porche leia khawvel le thilsiemhai chung a chen khom Pathien mit a tlung ta naw a, chuongchun mihriem ruolin hnuoi khom a suksiet tum a nih.

Chuong ang ngirhmuna hnuoi le mihriem hai an um lai chun “Nova ruok chun LALPA mit a tlung a” ti ei hmuh. A kawle kieng hai po po an porche lai khoma Nova chun midanghai thawdan chu zui nuom loin a khât chauh ding khom nisien felna lampui a hraw tlat a nih. Lalpa a hriet chiengna le a lampui a’n hmang

nawna hi ngaisang a va um lawm lawm de aw! Mihriem không zo zai lai khan Nova chauh hi Lalpa dîtđâna khawsa le a mit tlung chu a nih.

Baibula Nova chanchin an record hi a va tha lawm lawm de! Gen 6:9-a chun “Nova chu mi fel, a dam ruolpuihai laia dem kai lo, Pathien le intlon hlak mi a nih” tiin a’n ziek a nih. Lalpa le intlon hlak mi a ni ang hrimin Pathien chun khawvel chung a thil thaw ding po po khom a kuomah a hril a nih. Lalpa ditsakna chen khom changin ama le a sêng hai ta ding a an insanhimna ding long siem ding a’n hrietir bok a nih. Long a siem dân ding chen khom chipchier takin a la hril pei a. Heb 11:7-ah ‘Pathien tina thienghlim tak neiin a sungkuo himna ding long a tuk a’ ti ei hmuh. Pathien tina nei lo chun Pathien thupêk zawm intak tak ning a tih. Chuleiin, Pathien thupêk ang taka Nova’n long a siem khom khan Pathien le an intlon a, ransa hai khom Pathien ti danin longah a khum a ni khah.

Tui a hung kang a, khawmuola ama le a sunghai le rannung, vate le thilhring longa a khum hai an suok zo hnung khom khan Lalpa ta dingin maicham a siem a, pumraw thilhlân a’n hlan a nih. Lalpa

hmu lem a nih. Ama ngeiin “Lak nawk dinga ka hringna ka pêk ding a ni lei hin Pain a mi hmangai a nih. Tu khomin mi lapêk naw nih, keima nuom thuin ka pêk lem ding a nih. Pe thei ka na, la nawk thei khom ka nih; hi thupek hi ka Pa kuoma inthoka ka hmu a nih” tiin Johan 10:17-18-ah a lo hrilsa a nih. Mimal, pawl amanih hnuoi sorkarin Pathien Naupa, Isu Krista hringna an lapêk thei ding chi an nawh. Ei suolhai leia a Pa ditzawng le nuom dân thuin a hringna a pêk lem a nih.

5. Isun a nu le a bula ngir zirtir a hmangai chu a hmuin a nu kuomah, “**Nu, en ta, i naupa kha**” a ta; zirtir kuoma khom chun, “**En ta, i nu kha**” a ti bok a (Johan 19:26-27). Hi taka ‘zirtir a hmangai’ a ti hi Zebedai naupa, Johan ni dingin mi tam tak chun an ring a. “Chu taka inthok chun chu zirtir chun ama inah a thuoi tah a” a ti hin zirtir ngaisakna hnuoiah Mari hi a um tah tina a nih.

Zirtirin Isu hmangaina a dong kha a mihriem chanpui kuomah hmangaina vêk a pêk sawng a nih. Kraws hin Pathien hmangaina leia mi rethei le thangpui ngai hai a mi ngaisakzie a suklang a. Chuleiin, krawsa Pathien le mihriem kêra inlaichinna thar a mi siem pêk hin mihriem le mihriem kêra khom inremna hai, inngaisaktuona hai, inhmangaituona hai le rong inbawlpêktuona hai a hringsuok ve a nih. Isu Krista krawsa inthok khan hmangainaa inzom le insui khawm sungkuo thar indinin a hung um tah a nih. Chu sungkuo chu Isu Krista sungkuo, Pathien sungkuo amanih Pathien kohran ei ti hih a nih. Chu sungkuoa um hai chun inzatonin ei inhmangaituo ding a nih.

6. Thil po po a tlung kim tah ti Isun a hriet chun “**Ka dang a char**” a ta (Johan 19:28). Krawsa hemde le khaikâng hai chu an taksain tui a pai, boruok le nisain a hip kang leiin an dang a châr êm êm hlak a nih. Isu Krista lem kha chu krawsa an hemde bakah an soisak nasat leia hliem a tuor hai leiin a dang a char hle ding a nih. Hi hin Isu kha zaah za mihriem a nih ti a sukchieng hle. Chuleiin, krawsa a tuorna kha a ta dingin a nêpin a olsampêk chuong naw a nih.

Isu Krista hin a Pa ditzawng thaw nuomin thlarauin a dang khom a châr bok a nih. A Pa ditzawng chu eini, misuolhai sandam ei ni theina dinga krawsa tuorna le thina no dawn chu a nih. “A mi tirtu ditzawng thaw le a sin hlen hi ka bu a nih” (4:34) tiin a lo hril a. Chun, “Pain dawn dinga no a mi pêk chu ka dawn naw ding maw?” (18:11) tiin krawsa tuorna a hlen tumzie thu Peter kuomah a lo hril bok a nih.

7. Isun “**A kin tah**” a ta, a lu a kun a, a thlarau an thla tah a (Johan 19:30). Hi hi a kim tah, an zo tah, a tawp tah, a suo tah, hlen a ni tah, thang suo a ni tah ti thei a ni bok a nih. Isu taksa’n rinum a tuor a tawp thu le krawsa a thina leia Pathienin mihriemhai sandamna a mi siempêk a hlen tâk thu a mi puong pêk a nih. Krawsa hemde ni zing siin hnena hlado a mi’n sam pêk a ni hi tie. A va lawm umin a va ropui de! Pathien Lekha Thua hrillawka lo umhai po po kha a hung tlungkim tah a nih.

A lu a kun a, a thlarau a’n thla tah a. Hi hin mi that amanih a hringna mi lâk pêk ni loin Isu Krista ngeiin a hringna a pêk lem a nih. Chun hnena a chang tah ti le a thonawk ding ti hrein thlamuong tak le ngaingam takin a lu a kun a, a thlarau a’n thla tah a nih.

Lalpan a thu malsawm raw se. Amen.

Kristien Puitling Nun

Pu Timothy Shakum

*Ka naupang lai khan naupang tongin ka tong a, naupang lungril ka put a,
naupang ngaituo dan angin thil ka ngaituo hlak;
ka hung puitling hnung ruok hin chu naupang
thaw dan chu ka bân-san tah (I Kor 13:11)*

Kum a hung thar a, pa rawnkai le rem hre deu hai chun thupui an siem a, chu dungzui chun hma an dom a, hlawk takin chu kum chu an hmang el hlak a nih. Tukum ei Fellowship khomin 'Kristien Puitling Nun' ti thupui tha tak ei hang thlang a, hi hi hmang tangkai seng bok inla ti chu ei nuom tak zet a nih.

Ei huopzau ang bokin 'patling' ti ni lovin 'puitling' ei hang ti thap el a. Patling thumal hang hmang inla chu nuhaiin in mi hriet fûk naw khom an ti el thei, an ni hi tangkai êm êm voisun nia hi chen ei tlungna san laia poimaw tak an nih. Ei thupuia inthok hin a chîn taka inthoka a lien tak chenin Kristien Puitling hringnun ei khal thei seng a, chu ding chun mimal tinah a'n nghat a nih.

Mi, ringthar a hung ni hlim chun, a Kristien kalchawi nun khom a la naupang a, sienkhom Pathien thu a hung hriet chieng deu deua, a zawm pei a, chuongchun Pathien ringna huosen tak hung nei tung peiin thahnemngaina a hung ra suok pei. Chuong mihai chu kristien puitling nun khaltu ei ti hai chu an nih. Nisienlakhom, ringtu inti thenkhat Pathien thu le hla ngaisaka hrezuol nuom naw hai chu ringtu puitling ei ti thei nawh.

Nova thilhlân:

Nova hun laia tuilet chu hnuoi chung a inthokin a kang hnung chun long inkhumna chu Nova'n a hawk a, a hang ngha vêl a, hnuoi chu a lo inhil ta huou a. Chu zoa chun Nova'n LALPA ta dingin maichâm a siem a, sa thienghlim tinreng laia mi le vate thienghlim tinreng laia mi a lâk a, maichâmah pumraw thilhlânah a'n hlân a. LALPA chun rimtui chu a lo hriet a. Hi thu le inzom hin hang inngaituo inla, ei lawmna niah iengtin am lawmna ei siem hlak a? ti hi thil poimaw tak a nih. Nova'n Pathien thu huoitaka a ring leiin a sũnghai po po leh sanhimin a um a, rannung chi tinreng hai khom an him pha a, Pathienin chi tam tak thlaa hung pungin, hnuoi hi hlao sip ding le hnuoi hi mihriem leiin tongsie inphur nawk ta ngai lo dingin Pathienin thu a tiem bok a. Hienghai po po Nova'n a hriet chun a petu Pathien kuoma lawmthu hril naw chu a thaw ding a um naw ti hrein Pathien kuomah maichâm a siem nghal a ni kha.

Hi hi ringtu puitling nun chu a nih. Ei lawmna le hlimna nia Pathien kuoma lawmthu ei hril hlak ding a nih. Chu chu mani ina sungkuo maichâm siemin an thaw thei a, Pastor/ Upa khom fielin mi tongtai pêk dingin ei ngen thei bok a, kan lawm êm a tiin kohran mipui hai le khom

Hrepuitu : March&April 2011

ei lawm tlâng thei bok a nih. A mi petu kuoma lawmthu hril bok kohran hai le thingpui le bei hang dawn le fak tlâng chu inhoi tak a ni aw! Chu ni lova, lawmna nia, ruolcham infiel khawma malsawmna mi petu Pathien khom hrefu mang lova party thaw hlak hai chu ringtu puitling ei ti thei naw a nih. Tuhin chu ringtu puitling ei inti ta si hin chu, 'naupang ngaituo dân angin thil ka ngaituo hlak; ka hung puitling hnung ruok hin chu naupang thaw dân chu ka bân-san tah' ei ti ve ding a'n tah. Kristien kalchawinaa hin a tha naw hai ei bân-san pei naw chun kristien puitling nun khal a thei naw ding a nih.

Ringna puitling:

Isu Krista lal le sandamtu a nina ringna puitling tak nei hai chu kristien puitling nun khaltu ei ti hai chu an nih. Ringna puitling tak nei ding chun hriet chieng phot a ngai a nih. A hrie chieng naw hai chun iengtin am ring thei an ta? ti hi zawna poimaw tak a nih. Hriet chiengna ding chun nitin a thu thienghlim tiema Pathien le inpawltlângna nei a ngai a nih. A thuhai chu amain ei lungril phekah a tu nghet ta zet chun ei hung hriet chieng ta êm êm a, A thu tiem le ama leh inpawl chu a thlum ei ti ngawi ngawi a, thil dang dang nekin ei thlang lem el a nih.

Chuleichun, kristien puitling nun ei khal thei sengna ding chun ni tin a thu thienghlim tiema ama le inpawl ding ei nih. Ni tin sungkuo maichâm siem hlak mi ei ni bok ding a nih. Vêngbuk le kohran inkhawm ngai poimaw a thang hlak ding ei nih. Tu lem hin chu Baibula ei hmu angin "ringna le Pathien Naupa hrietna kongah zâi khata luong a, hung puitling a, Krista a famkim anga ei hung famkim ve theina dingin" ti lungrila neiin

thuoitu haiin vêngbuk baibul study dân thiem deuin prokram an hung siem a, hi hi ei lo ngai poimaw a ei lo lâk ursun phot chun ringna kongah hung puitling pha tâng ei ta, chu chun kristien puitling nun khaltu ei hung nithei tak tak ding a nih.

Baibulah kum tienga upa deu ringna puitling nei hmu ding an tam ang bokin a naupang deu khom ei hmu bok a, chuonghai laia nasa taka ka lungril hnetu le ka nun thuoitu chu Josefa hi a nih. Naupang chite a nia inthokin Pathien ringna huosen tak neiin ama tia, a thu hrea zawmtu a ni leiin a kuomah Pathien a um tlat a, ngirhmun inhnuoitea inthokin a'n sângtak chen an tlungtir pha a ni kha. Rethei le hausak hunah khom a hringnun a buoi ngai rêng rêng naw a, suol thlêm thlûkin a um ngai bok nawh. Asan chu kristien puitling nun khaltu a ni tlat leiin.

Unauhai, ka um dân inçhûktuhai ni pei ro:

Tirko Paula chun Filipi mihai kuomah Krista hmangaina le lunginsietna famkim chang tah le siem famkima um tah inti a ni naw thu hrilin, Krista Isu mi man san chu hlen ngei tumin hma tieng a nor pei a ni lem thu a hril a. Thangsuo taah a'n ngai dèr nawh. Isu Krista zara lawmman hmu dinga chung tienga Pathien kona chu chang ve ngei dingin, tum ram tieng chu a pan ngat ngat lem a nih. Tirko Paula rongbawlina hi ei en chun lungril a tawk êm êm a, a hun tawp tieng lem khan chuh a thi ding a hriet chieng ta bok a, rongbawlina hmabâk zo lo inkhaw taka um bok, hmangaina mitthli pumin ringtu naupang tak ni hai sienkhom a thu inçhûktir hai le a um dân inçhûka zawm phot a, hung puitling pei el dingin a hril non nawk pei a ni kha. (Phek 11 ah...)

Hrepuitu : March&April 2011